

**REGIONAL NEWS UNIT
ALL INDIA RADIO, AGARTALA
Date: 24-10-2025
Time: 07:55-08:05 PM Hrs
BENGALI EVENING BULLETIN**

Headlines :

- (১) মুখ্যমন্ত্রী অধ্যাপক ডা: মানিক সাহা আজ অষ্টম পর্যায়ের রাজ্যভিত্তিক সুস্থ শৈশব সুস্থ কৈশোর অভিযানের সূচনা করেন।
- (২) প্রধানমন্ত্রী নরেন্দ্র মোদী আজ বলেছেন যে কর্মসংস্থান মেলা দেশের যুবসমাজের স্বপ্ন পূরণের একটি মাধ্যম হয়ে উঠেছে।
- (৩) রাষ্ট্রপতি দ্রৌপদী মুর্মু বলেছেন যে ২০৪৭ সালের মধ্যে বিকশিত ভারতের লক্ষ্য অর্জনের জন্য নারীদের সক্রিয় অংশগ্রহণ অপরিহার্য।
- (৪) অর্থমন্ত্রী নির্মলা সীতারমন বলেছেন যে পরবর্তী প্রজন্মের জিএসটি সংস্কার কর ব্যবস্থাকে আরও দক্ষ, ন্যায্যসঙ্গত এবং প্রবৃদ্ধিমুখী করে তুলবে।

MSSKA-Khowai :

মুখ্যমন্ত্রী অধ্যাপক ডা: মানিক সাহা আজ তেলিয়ামুড়া টাউন হলে অষ্টম পর্যায়ের রাজ্যভিত্তিক সুস্থ শৈশব সুস্থ কৈশোর অভিযানের সূচনা করেন। এই অভিযান চলবে আগামী ৬ই নভেম্বর পর্যন্ত। অষ্টম পর্যায়ের এই অভিযানে ১ থেকে ১৯ বছর বয়সী মোট ১০ লক্ষ ৫৯ হাজার ১৮২ জন ছেলেমেয়ে এবং কিশোর কিশোরীদের ওষুধ খাওয়ানো হবে।

এই কর্মসূচিতে একটি নতুন কার্যক্রম সংযোজন করা হয়েছে। তা হচ্ছে ইউ-উইন(U-WIN)। এই প্ল্যাটফর্মের মাধ্যমে শিশুর আভা (ABHA) আইডি তৈরি করা হবে। শিশু ও কিশোর-কিশোরীদের সুস্থ রাখতে তাদের পুষ্টির বিকাশ, শারীরিক এবং জ্ঞানগত ক্ষমতার বিকাশ এবং কিশোর-

কিশোরীদের রক্তাল্পতা নিয়ন্ত্রণ করাই মুখ্যমন্ত্রী সুস্থ শৈশব সুস্থ কৈশোর অভিযানের উদ্দেশ্য।

অনুষ্ঠানে মুখ্যমন্ত্রী শিশু ও কিশোরদের সঠিক সময়ে প্রয়োজনীয় টিকা এবং ঔষধ প্রদানের মাধ্যমে রোগ মুক্ত রাখার উপর গুরুত্ব আরোপ করেন। তিনি রাজ্যের স্বাস্থ্য পরিষেবার উন্নয়নে রাজ্য সরকারের গৃহিত পদক্ষেপ বিস্তারিত উল্লেখ করেন। অনুষ্ঠানে বক্তব্য রাখেন সরকারী মুখ্য সচেতক কল্যাণী রায়।

PM, Rojgar Mela :

প্রধানমন্ত্রী নরেন্দ্র মোদী আজ বলেছেন যে কর্মসংস্থান মেলা দেশের যুবসমাজের স্বপ্ন পূরণের একটি মাধ্যম হয়ে উঠেছে। প্রধানমন্ত্রী নতুনদিল্লিতে সপ্তদশ জাতীয় রোজগার মেলায় এক ভিডিও বার্তায় একথা বলেন। এই অনুষ্ঠানে, বিভিন্ন সরকারি বিভাগ এবং সংস্থায় ৫১ হাজারেরও বেশি নবনিযুক্ত যুবক-যুবতীকে রোজগার মেলা উদ্যোগের আওতায় নিয়োগপত্র বিতরণ করা হয়। শ্রী মোদী বলেন, শুধুমাত্র এই কর্মসংস্থান মেলার মাধ্যমেই গত কিছুদিনে ১১ লক্ষেরও বেশি যুবক-যুবতীকে নিয়োগপত্র দেওয়া হয়েছে। প্রধানমন্ত্রী সাড়ে তিন কোটি যুবক-যুবতীকে চাকরি প্রদান করার জন্য দেশে 'বিকশিত ভারত যোজনা'ও চালু করেন। শ্রী মোদী বলেন যে, গত ১১ বছর ধরে দেশ বিকশিত ভারত গড়ে তোলার সংকল্প নিয়ে এগিয়ে চলেছে এবং যুবসমাজ এতে সবচেয়ে গুরুত্বপূর্ণ ভূমিকা পালন করেছে।

#####Byte-PM#####

তিনি আরও বলেন যে, বিজেপি-এনডিএ সরকারের অগ্রাধিকার হল যুবসমাজের ক্ষমতায়ন। শ্রী মোদী বলেন যে স্টিল ইন্ডিয়া মিশনের মতো প্রচারণা যুবসমাজকে দক্ষতা প্রশিক্ষণ প্রদান করে, অন্যদিকে জাতীয় ক্যারিয়ার পরিষেবা প্ল্যাটফর্মের মতো উদ্যোগগুলি তাদের নতুন সুযোগের সাথে সংযুক্ত করেছে। তিনি আরও বলেন যে, শুধুমাত্র এই প্ল্যাটফর্মের

মাধ্যমেই ইতিমধ্যে ৭ কোটিরও বেশি শূন্যপদের তথ্য যুবসমাজের সঙ্গে ভাগ করে নেওয়া হয়েছে। শ্রী মোদী যুবসমাজের জন্য আরেকটি বড় পদক্ষেপ হিসেবে প্রতিভা সেতু পোর্টালকে তুলে ধরেন।

প্রধানমন্ত্রী মোদী আরও বলেন যে, সরকার ভারতের যুবশক্তিকে জাতির সর্বশ্রেষ্ঠ শক্তি হিসেবে বিবেচনা করে। তিনি আরও জোর দিয়ে বলেন যে, দেশের যুবশক্তির কথা মাথায় রেখেই ভারতের বিদেশনীতি তৈরি করা হচ্ছে। প্রধানমন্ত্রী বলেন যে, ভারতের কূটনৈতিক আলোচনা এবং বিশ্বব্যাপী সমঝোতা স্মারকগুলিতে যুব প্রশিক্ষণ, দক্ষতা বৃদ্ধি এবং কর্মসংস্থান সৃষ্টির বিধানও অন্তর্ভুক্ত রয়েছে।

MSSKA-Rajib Bhattacharjee :

রাজ্যের বিভিন্ন জেলায় আজ মুখ্যমন্ত্রী সুস্থ শৈশব সুস্থ কৈশোর অভিযানের অষ্টম পর্যায়ের সূচনা করা হয়। সাংসদ রাজীব ভট্টাচার্য আজ ধলেশ্বরস্থিত কামিনী কুমার সিংহ মেমোরিয়াল দ্বাদশ শ্রেণী বিদ্যালয়ে পশ্চিম জেলা ভিত্তিক অষ্টম পর্যায়ের মুখ্যমন্ত্রী সুস্থ শৈশব, সুস্থ কৈশোর অভিযানের সূচনা করেন। অনুষ্ঠানে উপস্থিত ছিলেন পশ্চিম ত্রিপুরা জিলা পরিষদের ভারপ্রাপ্ত সভাপতি বিশ্বজিৎ শীল।

MSSSKA-Sepahijala :

সিপাহীজলা জিলা সভাধিনেত্রী সুপ্রিয়া দাস দত্ত জেলা স্বাস্থ্য আধিকারিকের কার্যালয়ের সিপাহীজলা জেলাভিত্তিক অভিযানের সূচনা করেন। অনুষ্ঠানে উপস্থিত ছিলেন চড়িলাম পঞ্চায়েত সমিতির চেয়ারম্যান খেলা ভৌমিক, সিপাহীজলা জেলার স্বাস্থ্য ও পরিবার কল্যাণ আধিকারিক ডক্টর দীপ কুমার দেববর্মা, সমাজ কল্যাণ ও সমাজ শিক্ষা আধিকারিক উত্তম কুমার দাস, সিপাহীজলা জিলা পরিষদের স্বাস্থ্য বিষয়ক স্থায়ী কমিটির চেয়ারম্যান সীমা ভৌমিক প্রমুখ।

MSSSKA-UNAKOTI :

কৈলাশহরের উনকোটি কলাক্ষেত্রে অভিযানের জেলাভিত্তিক কর্মসূচির সূচনা করেন উনকোটি জিলা পরিষদের সভাপতি অমলেন্দু দাশ। উপস্থিত ছিলেন উনকোটি জেলার জেলা শাসক ডক্টর তমাল মজুমদার, CMO ডাঃ শীর্ষেন্দু চাকমা, জেলা নোডাল অফিসার ডাঃ অয়ন রায় প্রমুখ। অনুষ্ঠানে কয়েকটি শিশুকে কুমিনাশক এনবেনডাজল ট্যাবলেট খাওয়ানো হয়।

MSSKA-South :

সার্কমের শ্রীনগর দ্বাদশ স্কুলে আয়োজিত অভিযানের দক্ষিণ জেলাভিত্তিক কর্মসূচির সূচনা করেন জিলা পরিষদের সভাপতি দীপক দত্ত। উপস্থিত ছিলেন পোয়াংবাড়ি পঞ্চায়েত সমিতির চেয়ারপার্সন মনিবালা দত্ত বৈদ্য, জেলা শাসক মহম্মদ সাজ্জাদ পি প্রমুখ।

MSSSKA-Gomati :

করবুক মহকুমা হাসপাতালে আয়োজিত অনুষ্ঠানে অভিযানের গোমতি জেলাভিত্তিক কর্মসূচির সূচনা করেন বিধায়ক সঞ্জয় মানিক ত্রিপুরা। উপস্থিত ছিলেন করবুক ব্লক উপদেষ্টা কমিটির ভাইস চেয়ারম্যান প্রণব কুমার ত্রিপুরা, অতিরিক্ত জেলা শাসক সুভাষ আচার্য, জেলা মুখ্য স্বাস্থ্য আধিকারিক ডাক্তার কমল রিয়াং, করবুক, ব্লকের বিডিও শুভ্রজিত পাল প্রমুখ।

CM :

মুখ্যমন্ত্রী অধ্যাপক ডাঃ মানিক সাহা বলেছেন, গতকাল ত্রিপুরা বনধের দিনে কমলপুর মহকুমার শান্তিরবাজারে হামলার ঘটনার সঙ্গে জড়িত ব্যক্তিদের বিরুদ্ধে রাজ্য সরকার কঠোরতম ব্যবস্থা গ্রহণ করবে। এরজন্য

পুলিশকে যথাযথ নির্দেশ দেওয়া হয়েছে। শান্তিরবাজারের ঘটনায় আহত ব্যক্তিদের শারীরিক অবস্থার খোঁজখবর নিতে গিয়ে আজ জিবি হাসপাতালে সংবাদ মাধ্যমকে তিনি একথা বলেন।

এদিকে, ধলাই জেলার জেলাশাসক বিবেক এইচ বি জানিয়েছেন, বর্তমানে কমলপুর মহকুমা এলাকায় বিএনএস ১৬৩ ধারা জারি রয়েছে। তিনি কমলপুর মহকুমার সর্বত্র শান্তিবজায় রাখার জন্য জনগনের প্রতি আহ্বান জানিয়েছেন।

Update Akashvani :

এখবর শুনছেন, আকাশবাণী আগরতলা কেন্দ্র থেকে।

Sound Byte

আকাশবাণীর সংবাদের আপডেট পেতে লগ ইন করুন – ডব্লিউ. ডব্লিউ. ডব্লিউ ডট নিউজ অন এ আই আর ডট কম এবং নিউজ অন এ-আই-আর অ্যাপ, এবং টুইটার ও ফেসবুক প্ল্যাটফর্মে-এ এ-আই-আর-নিউজ-এলার্টস-এ। ইউ-টিউব-এ লক্ষ্য করুন নিউজ-অন-এআইআর-অফিসিয়াল-এ।

এছাড়াও আকাশবাণী আগরতলার সংবাদ আপডেট পেতে দেখুন টুইটার বা এক্স হ্যান্ডলে আকাশবাণী নিউজ আগরতলা / ফেসবুকে এ-আই-আর নিউজ আগরতলা এবং ইউ টিউবে আকাশবাণী নিউজ আগরতলা।

President :

রাষ্ট্রপতি দ্রৌপদী মুর্মু বলেছেন যে ২০৪৭ সালের মধ্যে বিকশিত ভারতের লক্ষ্য অর্জনের জন্য নারীদের সক্রিয় অংশগ্রহণ অপরিহার্য। তিনি বলেন, নারী নেত্রীদের নেতৃত্বে একটি সমাজ আরও মানবিক এবং কার্যকর হবে। রাষ্ট্রপতি আজ কেরালার এর্নাকুলামে সেন্ট থেরেসা কলেজের শতবর্ষ উদযাপনের উদ্বোধন করে সমাবেশে ভাষণ দেওয়ার সময় একথা বলেন।

রাষ্ট্রপতি জাতি গঠন এবং আর্থ-সামাজিক সংস্কারে কেরালার নারীদের অবদানের কথা উল্লেখ করে বলেন, তারা তাদের উৎকর্ষতার উদাহরণ স্থাপন করেছেন। তিনি গত কয়েক দশক ধরে নারীদের শিক্ষিত ও ক্ষমতায়নে প্রতিষ্ঠানটির প্রচেষ্টার প্রশংসা করেন। উদ্বোধনী অনুষ্ঠানে রাষ্ট্রপতি কলেজের শতবর্ষ পূর্তির লোগো উন্মোচন করেন।

GST Reforms :

অর্থমন্ত্রী নির্মলা সীতারমন বলেছেন যে পরবর্তী প্রজন্মের জিএসটি সংস্কার কর ব্যবস্থাকে আরও দক্ষ, ন্যায্যসঙ্গত এবং প্রবৃদ্ধিমুখী করে তুলবে। তিনি বলেন, সরকার সং করদাতাদের জীবন সহজ করতে প্রতিশ্রুতিবদ্ধ। আজ গাজিয়াবাদে নতুন সিজিএসটি ভবনের উদ্বোধন করে মন্ত্রী বলেন, দক্ষ করে ব্যবস্থা অর্থনৈতিক প্রবৃদ্ধিকে স্বরাস্ত্রিত করবে। তিনি বলেন, জিএসটি কাউন্সিল জিএসটি নিবন্ধন প্রক্রিয়া সহজতর করার জন্য পদক্ষেপ অনুমোদন করেছে, যা এটিকে আরও সহজ, নিরবচ্ছিন্ন এবং স্বচ্ছ করে তুলবে। মন্ত্রী বলেন, আগামী মাসের ১ তারিখ থেকে একটি সরলীকৃত জিএসটি নিবন্ধন প্রকল্প কার্যকর হবে।

###Byte- Nirmala Sitharaman###

Speaker-Health :

রাজ্য বিধানসভার সচিব আজ এক প্রেস বিবৃতিতে জানিয়েছেন, বিধানসভার অধ্যক্ষ বিশ্ববন্ধু সেন বর্তমানে বেঙ্গালুরুর এস্টার সিএমআই হাসপাতালে চিকিৎসাধীন। তিনি আগের তুলনায় বর্তমানে কিছুটা ভালো আছেন। কৃত্রিম পর্যায় সরিয়ে নিজে থেকে শ্বাস-প্রশ্বাস নিতে পারছেন।

শ্রী সেন গত ১১ আগস্ট হাসপাতালে ভর্তি হন। তাঁর চিকিৎসা চলছে হাসপাতালের গ্লোবাল সেন্টার ফর এক্সিলেন্স-এর ডিরেক্টর এবং লিড কনসালট্যান্ট নিউরোসার্জন ডঃ রবি গোপাল ভার্মা-র তত্ত্বাবধানে। এস্টার

সিএমআই হাসপাতালের পক্ষ থেকে জানানো হয়েছে, বিশ্ববন্ধু সেন বর্তমানে চিকিৎসকদের পর্যবেক্ষণে স্থিতিশীল অবস্থায় আছেন এবং তাঁর শারীরিক অবস্থার উন্নতি অব্যাহত রয়েছে।

CPIM :

সি পি আই এম এর রাজ্য কমিটির আহবানে তিন দফা দাবিতে আজ আগরতলার ওরিয়েন্ট চৌমুহনীতে তিন ঘন্টার গণঅবস্থান পালন করা হয়। বক্তব্য রাখেন প্রাক্তন মুখ্যমন্ত্রী মানিক সরকার, বিরোধী দলনেতা তথা সিপিআইএম রাজ্য কমিটির সম্পাদক জিতেন্দ্র চৌধুরী, সিপিআইএম রাজ্য সম্পাদক মন্ডলীর সদস্য মানিক দে, রতন দাস ও কৃষ্ণা রক্ষিত। তারা তাদের বক্তব্যে সাম্প্রতিককালে রাজ্যের বিভিন্ন ঘটনাগুলি উল্লেখ করে রাজ্য সরকারের সমালোচনা করেন।

Maan-Ki-Baat :

প্রধানমন্ত্রী নরেন্দ্র মোদী আগামী ২৬শে অক্টোবর আকাশবাণীতে 'মন-কি-বাত' অনুষ্ঠানে তাঁর চিন্তাভাবনা দেশ-বিদেশের মানুষের সঙ্গে ভাগ করে নেবেন। এটি হবে মন-কি-বাতের ১২৭তম পর্ব। বেলা ১১টা থেকে আকাশবাণী এবং দূরদর্শনের সবকটি চ্যানেল এবং আকাশবাণীর নিউজ অন এ.আই.আর, ওয়েবসাইট, মোবাইল অ্যাপ, প্রধানমন্ত্রীর দফতর, তথ্য ও সম্প্রচার মন্ত্রকের ওয়েবসাইট ও ইউটিউব চ্যানেলেও 'মন-কি-বাত' সম্প্রচারিত হবে।

Ekta Diwas, BSF, DG :

সীমান্তরক্ষী বাহিনী, বিএসএফ-এর মহানির্দেশক দলজিৎ সিং চৌধুরী আজ বলেছেন যে সর্দার বল্লভভাই প্যাটেলের ১৫০ তম জন্মবার্ষিকীতে, এবছরের একতা দিবস উদযাপন হবে জমকালো, অন্তর্ভুক্তিমূলক এবং তা সারা দেশের

নিরাপত্তা কর্মীদের অংশগ্রহণের সাক্ষী থাকবে। জাতীয় একতা দিবস-২০২৫ উদযাপন উপলক্ষে নতুনদিল্লিতে এক সাংবাদিক সম্মেলনে তিনি বলেন যে বৈচিত্র্যের মধ্যে ঐক্য, সম্প্রীতি এবং জাতি গঠনের চেতনা এই বছরের উদযাপনের মূল প্রতিপাদ্য হবে। তিনি নাগরিকদের এই উদযাপনে সক্রিয়ভাবে অংশগ্রহণ করার এবং দেশের ঐক্য ও অখণ্ডতাকে শক্তিশালী করার আহ্বান জানান। তিনি বলেন যে আসাম, ত্রিপুরা, ওড়িশা, ছত্তিশগড়, মধ্যপ্রদেশ, মহারাষ্ট্র, পাঞ্জাব, জম্মু ও কাশ্মীর, কেরালা এবং অন্ধ্রপ্রদেশের রাজ্য পুলিশ ইউনিটগুলিও এই উদযাপনে অংশগ্রহণ করবে। সিআরপিএফ বীরত্ব পুরস্কারপ্রাপ্ত, বিএসএফের সাহসিকতা পদক বিজয়ীরা এবং অপারেশন সিন্দুরের বীররাও এই উদযাপনে অংশ নেবেন।

Run For Unity :

আগামী ৩১শে অক্টোবর সদার বল্লভভাই প্যাটেলের জন্মবার্ষিকীতে রাষ্ট্রীয় একতা দিবস উদযাপনকে সামনে রেখে আজ আগরতলা এডি নগর পুলিশ মাঠ থেকে একতা দৌড় বা রান ফর ইউনিটির আয়োজন করা হয়। ত্রিপুরা পুলিশ আয়োজিত এই একতা দৌড়-এ পুলিশের বিভিন্ন ইউনিট এবং বেশ কয়েকটি সামাজিক সংস্থার পক্ষ থেকে যুবক-যুবতীরা এক বাইসাইকেল রেলিতে অংশ নেন। রেলীটি স্বামী বিবেকানন্দ ময়দানে গিয়ে শেষ হয়।

Weather :

আগামীকাল আকাশ সাধারণত মেঘাচ্ছন্ন থাকবে। সকালে হালকা কুয়াশা পড়ার সম্ভাবনা রয়েছে। আগামীকাল দিনের সর্বোচ্চ তাপমাত্রা ৩৫ ডিগ্রি সেলসিয়াস এবং সর্বনিম্ন ২৫ ডিগ্রি সেলসিয়াসের কাছাকাছি থাকতে পারে। আজ দিনের সর্বোচ্চ তাপমাত্রা ছিল ৩৪.৬ ডিগ্রি সেলসিয়াস এবং সর্বনিম্ন ২৫.২ ডিগ্রি সেলসিয়াস।
